



**ATASSUT**

**UPA14/11-1**

**Gerhardt Petersen**

**13.05.2014**

**Nunatta Karsiata 2013-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuut.**

(Aningaasaqarnermut Nunamullu Namminermut Naalakkersuisoq)

Nunatta Karsiata 2013-imut naatsorsuutaasa Inatsisartunit akuerineqarnissaat pillugu Inatsisartut aalajangiiffigisassaattut siunnersuutip siullermeerneqarnerani ATASSUT-mit imaattumik oqaaseqaateqassaagut:

Missingersuutigineqartumut sanilliullugu nunatta karsiata naatsorsuutaasa ersersippaa 2013-mi 174 mio. kr.-inik pitsanngoriartitsisoqarsimavoq. Taamalli annertutigisumik nikingasoqarnera, nikingassut plussip tungaanut sammigaluartoq imaaliinnarluta ATASSUT-mit nalileruminaatsipparput, tassami ingerlatsinermit aningaasartuutit ikileriarinneqarsimanerisa kingunerisaanik innuttaasunik sullissinerup pitsaassusaata innarlerneqarsimanerani kinguneqarsimassappat, soorunami tamanna naammaginassannginnami.

Tamatumalu saniatigut sanaartugassanut iluarsagassanullu aningaasaliussanut sanilliullugu atunngitsuukkat pissutaaqataalluinnarput nunatta karsiata angusarissaafiusutut isikkoqarneranut.

Ataaserli nunatta karsianut pitsaanngitsumik kinguneqaraluartoq ATASSUT-mit nuannaarutigivarput, tassalu imigassat aalakoornartortallit aammalu tupat akitsuutitigut isertitsissutaasarnert appariarujussuarsimagaluartoq ATASSUT-mit iluarisimaarparput, kisiannili tamatuma malitsigisaanik tassuuna nunatta karsianut isertinneqartartut annaaneqartut matussuserneqarnissaat pingaaruteqarmat ullumikkut, siunissami qaninnermi aammalu siunissami ungasinnermi allatigut isertitsiniarsinnaaneq annertuumik sammineqartariaqartoq ATASSUT-mit isumaqarpugut.



## ATASSUT INATSISARTUNI

---

Kisitsisitigut angusat Naalakkersuisut saqqummiussinerminni ersarissumik nassuaatigereematigit aammalu Inatsisartut Kukkunersiuinermut Ataatsimiititaliaata naatsorsuutit annertuumik misissorlugillu sammisussaammatigit ATASSUT-mit annertunerusumik oqaaseqaqqinnata inassutigissavarput Nunatta Karsiata naatsorsuutaasa akuerineqarnissaat pillugu siunnersuut aappassaaneerpeqartinnagu Inatsisartut Kukkunersiuinermut Ataatsimiititaliaanut suliassanngortinneqassasoq.